

BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON/KANTON SREDIŠNJA BOSNA
KANTONALNI SUD U NOVOM TRAVNIKU
Broj: 06 0 K 019787 25 K
Novi Travnik, 09.05.2025. godine

U IME FEDERACIJE BOSNE I HERCEGOVINE!

Kantonalni sud u Novom Travniku, u vijeću sastavljenom od sudija Kokić Edvina kao predsjednika vijeća, Pezer-Alić Aide i Trifković Denisa kao članova vijeća, uz sudjelovanje Kolak Lidije kao zapisničara, u krivičnom postupku protiv optuženog Z. N., zbog krivičnog djela „Ubistvo“ iz člana 166. stav 1. Krivičnog zakona Federacije Bosne i Hercegovine („Službene novine Federacije Bosne i Hercegovine“, broj 36/03, 21/04, 69/04, 18/05, 42/10, 42/11, 59/14, 76/14, 46/16 i 75/17) u sticaju sa krivičnim djelom iz člana 69. stav 1. Zakona o nabavci, držanju i nošenju oružja i municije SBK („Službene novine SBK“, broj 12/14, 10/22), sve u vezi sa članom 54. Krivičnog zakona Federacije Bosne i Hercegovine, po optužnici Kantonalnog tužilaštva Travnik broj: T06 0 KT 0035548 24 od 05.12.2024. godine, nakon javnog glavnog pretresa okončanog dana 07.05.2025. godine, u prisustvu Kantonalnog tužitelja Hadžić Šaćira, optuženog Z. N. i braniteljice optuženog Alme Tabaković advokata iz Zenice, po obavljenom vijećanju i glasanju, donio je dana 09.05.2025. godine i javno objavio sljedeću:

PRESUDU

Optuženi: Z. N. sin M. i majke H., djevojački A., rođen godine u mjestu B., općina T., nastanjen na adresi B. broj ..., Z., općina T., Bošnjak, državljanin BiH, JMB ..., pismen sa završenom SSS, po zanimanju vozač, penzioner, oženjen, otac dvoje punoljetne djece, lošeg imovnog stanja, neosuđivan,

KRIV JE

što je,

1. Dana 15.07.2024. godine, oko 19,00 sati, na lokalnom putu u mjestu Z.-B.i, u neposrednoj blizini križanja sa lokalnim putem za mjesto A., općina T., dok se kretao na biciklu, uočio da mu u susret dolazi putničko motorno vozilo marke Opel Vectra, registarskih oznaka ..., kojim je upravljao H. Z., sa suprugom i dvoje malodobne djece, da bi u trenutku kad su se mimoilazili isplazio jezik i počeo se rugati, zbog čega je H. Z. zaustavio svoje vozilo i po izlasku iz vozila obratio mu se riječima „Šta je N., šta hoćeš više od mene, što provociraš“, istom odgovorio riječima „Ja ću to stobom riješiti da niko ne vidi“, nakon čega je između optuženog N. Z. i oštećenog H. Z. došlo do razmjene udaraca nogama i rukama, zbog čega je L.Z. izašla iz automobila i pokušala da ih rastavi u čemu je i uspjela tako što je supruga uhvatila za ruku i odmakla od N. Z., da bi potom svjestan da pucanjem iz vatrenog oružja može lišiti života H. Z., što je i htio, iz pištolja marke „Beretta“, Mod-950 B, kal.6.35 mm, serijskog broja ..., kojeg je držao za pojasom, sa udaljenosti oko jedan metar, ispalio sedam hitaca u pravcu H. Z., tako da je svih sedam hitaca pogodilo H.

Z., od kojih hitaca je zadobio sedam strijelnih povreda i to, strijelnu povredu tipa ustrijela vrata lijevo sa ulaznim otvorom u koži, u njegovom stražnjem-gornjem dijelu, koji se nastavlja ustrijelnim kanalom u smjeru gore, nazad i lijevo ka dolje, naprijed i desno, kroz meko tkivo-tkivne strukture vrata, potom uz lijevu stranu vratne kralježnice, lomeći lijevi bočni nastavak II vratnog kralješka ujedno tada oštećuje stijenkiju donjeg dijela lijeve unutrašnje karotide arterije, završavajući se neposredno ispod donjeg ruba donje vilične kosti, strijelnu povredu tipa ustrijela grudnog koša sa ulaznim otvorom u koži njegove lijeve bočne strane, na udaljenosti oko 138 cm, mjereno od donjeg ruba stopala i oko 21 cm od prednje središnje crte, a u nivou prednje pazušne crte, koji se nastavlja ustrijelnim kanalom usmjerenim gotovo horizontalno, s lijeva udesno i blago nadolje, kroz meka potkožna tkiva lijeve bočne strane grudnog koša, potom kroz IV međurebarni mišić, nastavljajući se u stražnji dio lijeve grudne duplje, minimalno oštećujući stražnji dio lijevog pluća, završavajući se vjerovatno u prostoru grudne duplje, strijelnu povredu tipa ustrijela grudnog koša i trbuha sa ulaznim otvorom u koži lijevog bočno – stražnjeg dijela leđa na oko 128 cm mjereno od donjeg ruba stopala i na oko 18 cm od stražnje središnje crte, koji se nastavlja ustrijelnim kanalom u smjeru ka dolje i naprijed, kroz meko-tkivne strukture navedenog dijela leđa, potom kroz IX lijevo rebro, lijevu polovicu prečage, nastavljajući se u lijevu polovicu trbušne duplje, probijajući lijevi zavijutak debelog crijeva, potom oštećujući rep gušterače i hilus slezene, završavajući se u trbušnoj duplji, strijelnu povredu tipa ustrijela grudnog koša i trbuha sa ulaznim otvorom u koži donje polovice leđa desno, na udaljenosti na oko 133 cm od donjeg ruba stopala i na oko 2.5 cm udesno od stražnje središnje crte, koji se nastavlja ustrijelnim kanalom u smjeru prema naprijed kroz meka potkožna tkiva navedenog dijela leđa, potom kroz stražnji okrajak X desnog rebra, završavajući se u trbušnoj duplji, uz desni režanj jetre, strijelnu povredu tipa ustrijela grudnog koša sa ulaznim otvorom u koži vanjskog, gotovo bočnog dijela leđa desno, na oko 136 cm iznad donjeg ruba stopala i na oko 13 cm udesno od stražnje središnje crte leđa, koji se nastavlja ustrijelnim kanalom ka dolje i desno, ulazeći u stražnji dio desnog prsišta, oštećujući stražnji dio desnog pluća, potom vjerovatno kroz vanjski dio desne polovice prečage završavajući se u prednjem dijelu stražnjeg okrajka X desnog rebra, strijelnu povredu tipa ustrijela gornjeg dijela lijeve nadlaktice sa ulaznim otvorom u koži vanjske strane njene gornje trećine sa prostrijelnim kanalom usmjerenim prema gore i nazad, a koji se prema nalazu obducenta završava u predjelu lijeve pazušne jame i strijelnu povredu tipa prostrijela središnjeg dijela lijeve podlaktice sa ulaznim otvorom u koži njene unutrašnje strane i prostrijelnim kanalom usmjerenim u pravcu ka naprijed i nešto nadolje, završavajući se u središnjem dijelu njene prednje strane, nakon čega je sjeo na bicikl i napustio lice mjesta, dok je H. Z. prevezen u Hrvatsku bolnicu dr. Fra Mato Nikolić u Novoj Biloj, a potom slijedećeg dana prevezen u Univerzitetsko klinički centar u Sarajevu gdje je, uslijed zadobivenih povreda preminuo dana 26.07.2024. godine u 18:11 sati,

dakle, drugog usmrtio,

2. Dana 15.07.2024. godine, oko 19,00 sati, u mjestu Z.-B., općina T., suprotno odredbama člana 8. stav 1. tačka b), kategorija B Zakona o nabavci, držanju i nošenju oružja i municije („Službene novine SBK“, broj 12/14, 10/22), kojom propisano da je zabranjeno nabavljanje, držanje ili nošenje oružja kategorije B bez odgovarajuće isprave o oružju, u koje se saglasno članu 7. stav 3. tačka a) Zakona o nabavci, držanju i nošenju oružja i municije ubraja poluautomatsko ili rapetirajuće

kratkocijevno vatreno oružje bez važeće isprave nabavio i držao vatreno oružje poluautomatski pištolj, marke „Beretta“, model 950 B, cal. 6,35 mm serijski broj ..., iako je znao da je za nabavljanje i nošenje ovakvog oružja potrebno odobrenje nadležnog organa, što je i htio, a koje vatreno oružje su pronašli i privremeno oduzeli policijski službenici MUP-a SBK Travnik prilikom uviđaja,

dakle, bez važeće isprave o oružju držao oružje B kategorije,

Čime je pod tačkom 1. počinio krivično djelo “Ubistvo” iz člana 166. stav 1. Krivičnog zakona Federacije Bosne i Hercegovine za koje mu sud utvrđuje kaznu zatvora u trajanju od 19 (devetnaest) godina u sticaju sa, pod tačkom 2. krivičnim djelom iz člana 69. stav 1. Zakona o nabavci, držanju i nošenju oružja i municije SBK za koje mu sud utvrđuje kaznu zatvora u trajanju od 1 (jedne) godine,

pa ga sud temeljem istog člana i uz primjenu odredbi članova 42., 43., 49. stav 1. i 54. stav 1. i 2. Krivičnog zakona Federacije BiH

OSUĐUJE

na jedinstvenu kaznu zatvora u trajanju od 19 (devetnaest) godina i 6 (šest) mjeseci.

Temeljem člana 57. stav 1. Krivičnog zakona Federacije BiH optuženom se u izrečenu kaznu ima uračunati vrijeme koje je proveo u pritvoru počev od 15.07.2024. godine u 21:00 sati, pa do upućivanja na izdržavanje izrečene kazne zatvora.

Temeljem člana 78. stav 1. Krivičnog zakona Federacije BiH optuženom se izriče sigurnosna mjera oduzimanja predmeta vatrene oružja poluautomatski pištolj, marke „Beretta“, model 950 B, cal. 6,35 mm serijski broj ..., te se isti ima uništiti po pravosnažnosti presude.

Temeljem člana 212. stav 3. Zakona o krivičnom postupku Federacije BiH oštećena L. Z. se radi ostvarivanja imovinsko-pravnog zahtjeva u cijelosti upućuje na parnični postupak.

Temeljem člana 202. stav 1. Zakona o krivičnom postupku Federacije BiH optuženi se obavezuje da naknadi troškove krivičnog postupka u iznosu od 3.300,00 KM, a koji se odnose na paušalne troškove, troškove vještačenja i troškove svjedoka u roku od 15 dana po pravosnažnosti presude, kao i naknaditi troškove službene odbrane čiju visinu će sud utvrditi posebnim rješenjem kada za to pribavi potrebne podatke.

Zapisničar
Kolak Lidija

Predsjednik vijeća
Kokić Edvin